



**TEZAU LITURGIC**  
**24 DECEMBRIE**

**SLUJBA**  
**SF. CUVIOS**  
**PETRU**  
**KOLPAKOV**  
**DE LA CIAGRIN**



**MOSCOVA, 2000**



# Служба святому праведному Петру Чагринскому

## На велицей вечерни

Блажен муж: 1-й антифон.

На Господи, возвах: стихиры на 8, глас 5.

Подобен: Радуйся:

Радуйся, отче Петре, любви ради Божией смиренномудр и незлобив был еси, воздержанием строго хранил еси заповеди Божии и послушлив отцам духовным был еси. Христу ныне молися даровати душам нашим велию милость.

Радуйся, любителю Христа, Господа своего теплейший, шествуя путем, указанным преподобным Серафимом, был еси, Петре, яко звезда многосветлая нам путеводная, яко свет велий нам путь указующий, яко адамант веры, нас укрепляющий. Поминай нас чад своих, совершающих память твою.

Радуйся, отче Петре, тако восхвалим тя Божия избранника Росийстей земли, припадая к многоцелебным мощем твоим. Правило был еси наставляющее к добродетели, и мы ти тако возглаголем: о, святе отче Петре, моли Христа Бога помиловатися душам нашим.

**Р**адуйся, отче Петре, возлюбивший Господа и ближнего яко сам себе, и тем приобретши богатство некрадомое на небесех и неистощимое, и мы чада твоя возглашаем пение достойное, совершающе память твою: молися у престола Господа Славы, спаситися душам нашим.

**Р**адуйся, отче Петре, многое милосердие и сострадание имел еси к нищим и бескровным, уготовляя им жилища, заботу и попечение имел еси о них неуклонно, скорбящих утешал еси, Христу подражая, всечестне, Того моли помиловати души наша.

**Р**адуйся, отче Петре, яко воистинну благочестно пожил еси на земли, и ныне в чертозех Небесных обитаеши Христа зряще, Того моли грехов оставление даровати, чтущим любовь святую память Твою.

**Слава, глас 2.**

**Подобен:** Придите, вернии:

**П**риидите, вернии, достойно восхвалим отца нашего Петра: храмоздателя благочестиваго, путеводителя ко спасению православных христиан, целебника неистощимаго, адаманта веры крепкаго, и возопиим, глаголюще: Радуйся, пастырю наш добрый; Радуйся, учителю незлобивый; Радуйся, яко крин процвел еси в

нашей земле; Радуйся, и нас, чада твоих, на Небеси не забываеши.

**И ныне, глас тойже, догматик:** Прейде сень законная:

**Вход, прокимен дне и чтения три:**

- 1. Притчей чтение:** Память праведнаго с похвалами:
- 2. Притчей чтение:** Уста праведнаго каплют премудрость:
- 3. Премудрости Соломоновой чтение:** Праведник аще постигнет скончатися:

**На литии стихира храма и стихиры святого, глас 2.**

**Подобен:** Киими похвальными:

**Киими** похвалами восхвалим отца нашего Петра, был бо еси дом Духу Святому, демонские полки побеждая постом, и молитвою страсти своя умирняя, научая нас добродетелями своими шествовати ко Христу Богу.

**Киими** похвальными песньми ныне составим ликование тебе, отче Петре, жизнь свою Богови посвятил еси и тем нешел еси сокровище добродетелей яко мудрый купец, Божественным промышлением наставляемь, шествовати стезею правою к Небеси помози и нам, совершающим

всехвальную память твою.

**К**иими похвальными песньми восхвалим тебе, праведне Петре, помощника в бедах и чудотворца тебе именующа земли Самарския, теплаго заступника, целебника безмезднаго всем с верою лобзающим честныя мощи твоя.

**Слава, глас б:**

**П**ристанище чадом твоим духовным был еси, отче Петре, собрав множество словесных овец, яко пастырь добрый вел еси к свету невечернему. Той и сердца наша направи ты почитающих.

**И ныне, глас тойже:**

**Н**а земли человеков радование, Пречестная Дево, спаси ны, к Тебе прибегающих с верою, и на Тя упование возложивших.

**На стиховне стихиры, глас 1.**

**Подобен: Небесных чинов:**

**Н**ебесных чинов радование, православия похвало и о верных пред Богом молитвенниче, блаженне отче Петре, Церковь наша тебе воспевае ныне у честных и многоцелебных мощей, чудотворче досточудне.

**Стих:** Праведник, яко финикс процветет, яко кедр иже в Ливане умножится.

**К**расных Ключей радование, Церкви Божией светлое торжество: в тебе бо сокровище

божественных даров явися, отче Петре, даруй нам, у твоих мощей молящимся, исцеление телес, и душ в Боге упокоение.

**Стих:** Насаждени в Дому Господни, во дворех Бога нашего процветут.

**С** небесными чинами сликовствующе, отче Петре, даруй нам исцеление от твоих честных и благодатных мощей, и молитвами твоими мы вси к Господу притецем, Того испроси душам нашим велию милость.

**Слава, глас 6:**

**Н**ыне стекошася вси вернии восхвалим память отца нашего Петра, сего похвалами яко цветы украсим, прилежнаго бо ученика преподобнаго Серафима, ревнителя Божиих заповедей и истиннаго путеводителя во Град Господень.

**И ныне, Богородичен, глас тойже:** Творец и Избавитель мой:

**Тропарь, глас 5:**

**Х**риста Бога всем сердцем возлюбил еси и за Ним ревностно последовал еси, все же мирское и суетное оставив, постом и молитвою плоть свою духови покорив, верных поучал еси стезям спасительным и вел их путем, указанным преподобным Серафимом, праведне отче Петре, моли Христа Бога спастися душам нашим.

## На утрени

На Бог Господь: тропарь святому дважды.

Слава и ныне: Богородичен, глас 5:

Радуйся, двери Господня непроходимая:  
радуйся, стено и покрове притекающих к Тебе.  
Радуйся, необуреваемое пристанище и  
неискусобращная, рождающая плотию Творца  
Твоего и Бога: молящи не оскудевай о  
воспевающих и кланяющихся рождеству  
Твоему.

По 1-ом стихословии седален, глас 2:

От юности благочестно за Христом последовал  
еси, праведне, житие земное украсив многим  
воздержанием и за сие от завистников немало  
претерпел еси, уничижения и насмешия и  
различну лжу, подозревая тебе в коем то ином  
служении, но ты следовал еси непоколебимо  
совету святых отцев, исполняя Волю Божию.

Слава и ныне, Богородичен:

Иже благодарно воспеваем Ти, Богородице, за  
Твоя ходатайства о нас грешных и Твоя  
милости, Владычице, просим, не остави нас,  
Пресвятая Дево, Тя бо и едину надежду имамы.

По 2-ом стихословии седален, глас 7:

Очистив душу свою от всякия скверны, узрел  
еси таинства Божия и сим научал еси верных,

возводя их к высоте духовней чистым житием, соблюдать и сохранять заповеди и обычаи православной церкви и во всем угождати Богови.

**Слава и ныне, Богородичен:**

От всякаго прилога сопротивна спаси и от стрел вражиих избави, молим Тя, Всенепорочная Богородице, Мати Бога Вышняго.

**Величание:**

Величаем тя, святыи праведный отче Петре, и чтим святую память твою, ты бо молиши о нас Христа Бога нашего.

**Иное величание:**

Ублажаем тя, святыи праведне отче Петре, и чтим святую память твою, миряном наставниче и собеседниче ангелом.

**По полиелеи седален, глас 5:**

Дивно житие твое, блаженне, яко смирение стяжал еси от юности и сего ради от всего мира отлучив себе, крест Господень возжелал еси носити и вся земная возненавидев, стремился наследити жизнь вечную.

**Слава и ныне, Богородичен:**

Пречистая Богородице, буди рабу Твоему крепкая помощнице и избави душу мою от сети диаволи и спаси мя, все житие во гресех

иждившаго, ходатайством молитвенника Божия Петра.

**Степенна, 1-ый антифон, глас 4.**

**Прокимен, глас 4:** Праведник, яко финикс процветет, яко кедр, иже в Ливане, умножится.

**Стих:** Насаждени в Дому Господни, во дворех Бога нашего процветут.

**Всякое дыхание: Евангелие от Иоанна, зачало 36.**

**По 50-м псалме стихира, глас 6:**

Праведне отче наш Петре, пред отшествием твоим из сего мира, собра бо духовнии своя чада и научал еси како жити, и кого слушати, и где питатися духовно, от Церкви Божией никако же отлучатися, и исполняти наставления преподобнаго Серафима, моли Христа Жизнодавца о душах наших.

**Канон праведному Петру, глас 2.**

**Песнь 1**

*Ирмос: Во глубине постла иногда фараонитское всевоинство преоруженная сила, воплощенное же Слово всезлобный грех потребило есть: препрославленный Господь, славно бо прославися.*

**Припев:** Святой праведный отче Петре, моли Бога о нас.

**К**ую похвалу принесем ти, святой отче Петре, жизнь свою посвятил еси Богу, плоть покорил еси духови, к Небесному граду шествовав невозвратно, ибо управлялся еси Духом Святым.

**П**уть тебе, отче, желаемый, поведали отцы от Серафима Саровского и ты последовал еси прилежно путем, вводящим ко Граду Небесному.

**Слава:** На землю добру пали зерна спасения и Божественным просвещением озарився премудре, тем и нас страстями омраченных озари, просвещением благодати и моли получит нам спасение.

**И ныне:** Трудждает мя буря немощного и окаянного и привлекает к пучине страстей, но Ты, о Мати Бога Вышняго, исцели страсти душевныя моя.

### Песнь 3

**Ирмос:** *На камени мя веры утвердив, расширил еси уста моя на враги моя, возвесели бо ся дух мой, вегда пети: несть свят яко же Бог наш, и несть праведен паче Тебе Господи.*

**П**лоти своея восстания, крепким воздержанием в пище и питии умертвил еси, блаженне, постоянно творя молитву Иисусову. Моли же Господа Вышняго обрести нам прегрешений разрешение.

**З**акону Божественному поучал еси, не имея

грамоты, и не ведый даже единыя буквы, был Духом Святым озарен свыше и Господь управлял еси твоим разумом, Его же умоли подати и нам просвещение Святаго Духа.

**Слава:** Яко весть Господь путь праведных, и путь нечестивых погибнет, глагола еси тако, отче Петре, темже молимся ти, не остави нас в своих молитвах, дабы и нам не погибнути.

**И ныне:** Мати Божия, Ты бо слышала еси искренния молитвы праведнаго, услыши же и нас и помолися о просящих и подаждь руку помощи погибающим.

#### **Седален, глас 4:**

Небесное стяжав жительство, блаженне, с юности, выну повинуюся Богу, страсти греховныя победил еси, и собранное тобою стадо Христово твердо вел еси путем, указанным Серафимом Саровским, строго храня заповеди Господни, дабы угодити Христу Богу.

#### **Слава и ныне, Богородичен:**

Предстательнице наша, Безневестная Дево, на Тя бо уповаем, непрестанно моли спастися душам нашим.

#### **Песнь 4**

**Ирмос:** Пришел еси от Девы, не ходатай, ни ангел, но Сам, Господи, воплощя и спасл еси

*всего мя человека. Тем зову Ти: слава силе Твоей, Господи.*

**В**озжелал еси, отче Петре, храм Божий построить, и намерение сие исполнил еси, ибо имел еси во всем, Единого Благодетеля и Всещедрого Господа.

**П**ребывающу ти в мире, яко на свещнице светильник, всех и всегда поучал еси истине и строго чтил еси святые дни и воскресныя, и Господь дарова ти благодать свыше, тем же ты вернии славим.

**Слава:** Болезни тяжции постигоша мя и телом немощен лежу, о отче Петре, верою зову ти, болезни сердца моего утоли.

**И ныне:** Со благоговением ныне поклонимся Пречистой Божией Матери, молящейся со блаженным Петром, просяще ниспослати нам велия милости.

### **Песнь 5**

**Ирмос:** *Просвещение во тьме лежащих, спасение отчаянных, Христе Спасе мой, к Тебе утреннюю, Царю мира, просвети мя сиянием Твоим: иного бо разве Тебе Бога не знаю.*

**М**нози верние людие Самарския земли текоша к тебе, отче Петре, ты же целил еси их болезни и язвы, и бесы изгонял еси силою Христовою, темже песнословим твое милосердие.

**П**оучал еси жителству истинному и просвещал еси сущия во тьме неверия, обличал еси нечестие, твердо стоял еси за веру православную, во всем примером был еси, отче Петре, моли о нас Единого Бога.

**Слава:** Увлекаемыми страстями различными, с верою и надеждою притекаем к твоему заступлению, отче Петре, твоими ходатайствами всех нас посети, моляся Вседержителю.

**И ныне:** Тя, Благословенная Владычице, скорая наша Заступнице и Ходатаице пред Богом, молю недостойный, спаси мя от бед и скорбей и лютых прегрешений, верою воспевающего Тя.

### **Песнь 6**

**Ирмос:** *В бездне греховной валяясь, неизследную милосердия Твоего призываю бездну: от тли, Боже мя возведи.*

**Л**уч Божественного Света возсия нам, приидите чада вернии, да озаримся им, да возгоримся духом, величающе песнями блаженного Петра.

**С**лаву, честь, богатство и чревоугодие ты отче презрел еси, устремляясь в Горния обители, угождая и работая Богови.

**Слава:** Всегда смирял еси плоть твою терпением, блаженне, путем тесным шел еси в жизнь вечную, благоугождая Единому Богу и Владыке.

**И ныне:** Пристанище нам буди, Мати Божия,

волнуемым житейскою бурей, и отишие в пучине скорбей, Владычице, помози нам, да не погибнем.

### Кондак, глас 8:

Земли Самарския учителю, с высоты прием благодать Святаго Духа, целил еси болезни и изгонял еси бесов, и Церкви Христовой до конца предан был еси, сего ради молим тя, отче Петре: моли Бога о духовных чадах своих.

### Икос

Возсиял еси зарею пресветлою, озаряя концы России, сошедшеся вернии воспоем праведнаго, того бо молитвами избавляемся от лютых обстояний, да прославим Христа, даровавшего нам сего источника исцелений, и блаженному Петру возопиим: моли Того о духовных чадах своих.

### Песнь 7

*Ирмос: Богопротивное веление беззаконнующаго мучителя высок пламень вознесло есть; Христос же простре богочестивым отроком росу духовную, сый благословен и препрославлен.*  
Преславная чудеса Божия милости, в нашей земли Самарстей содеяшася: Господь яви нам угодника, праведнаго отца Петра, придите вси песнями почтим зовуще: отец наших Боже,

благословен еси.

**Ликуют** людии вернии, в сей радостный праздник, перенесение твоих честных мощей, отче Петре, в ограду храма Архангельскаго, в селение Красные Ключи, и радостно с веселием сердца вопиют: отец наших Боже, благословен еси.

**Слава:** Избави мя болезней и скорбей и различных недугов молитвами твоими, блаженне отче Петре, яко от Бога прием благодать врачевати страсти, да с веселием поем ти: отец наших Боже, благословен еси.

**И ныне:** Пречистая Богородице, в страшный час суда моего защити мя и геенны избави. Яко да чту и воспеваю Тя во веки.

## Песнь 8

**Ирмос:** *Пещь иногда огненная в Вавилоне действия разделяше, Божиим велением халдеи опаляющая, верныя же орошающая поюция: благословите вся дела Господня, Господа.*

**Обретоша,** отче, твои мощи нетленнии и по сей день от них исходят токи исцелений, темже молим тя: и нас теплым твоим предстательством спаси поющих: благословите, вся дела Господня, Господа.

**Христов** угодниче, праведный отче Петре, не забуди и нас, призывающих тя истинно и

поющих: благословите, вся дела Господня, Господа.

**Слава:** Ты, о преблаженне, нищим питатель и убогим заступник и всем приходящим к тебе скорый помощник и защититель был еси, защити и нас твоим предстательством, поющих: благословите, вся дела Господня, Господа.

**И ныне:** Богородице Пресвятая, избави на Тя надеющихся от бед, и спаси от всякаго зла, сохрани в нощи и во дни, от враг видимых и невидимых, да славлю Тя Владычице.

### Песнь 9

**Ирмос:** *Безначальна Родителя Сын Бог и Господь, воплощся от Девы, нам явися, омраченная просветити, собрати расточенная, тем Всепетую Богородицу величаем.*

Святостию твоих дел и поучению словес Твоих насладишися преблаженне, и к мощем твоим искаху прикоснуться вернии, прославляют в дивных делах своих Господа.

**Како** достойно возвеличим тя, отче Петре, храм Божий поставив ради верных и до кончины своея предан делами Христу Богу, почитаем вси труды и болезни твоя и чтим тя, путеводителя ко спасению.

**Слава:** Благодаряще Бога, славим тя, отче Петре, Чагринский чудотворче, за твой великий

подвиг, его же совершил еси хранения ради веры православной на Руси, и за единение всех православных христиан.

**И ныне:** Богородице Дево, свыше Твоим благоутробием нас немощных посети, и от тли и бед избави нас почитающих Тя.

**Светилен:**

Светом благодати озарился еси по кончине, праведне отче Петре, освящаеши ныне Самарскую землю за своя подвиги и труды, тем же песнопение приносим ти, святе: твоими мольбами и нас жизни вечныя наследники сотвори, умоляя Всещедраго Бога.

**Слава и ныне, Богородичен:**

Инаго прибежища и крепости воистину не стяжахом, Владычице, помози, да не погибнем, и Твою благодать покажи нам, и величество Твоего милосердия.

**На хвалитех стихиры на 4, глас 8.**

**Подобен: О, преславнаго чудесе:**

О, преславнаго чудесе, наставниче и учителю, отче Петре, воздержанием страсти плотския угасил еси, добродетелем поработился еси, бесстрастия был еси красен сосуд, благодать приим от руки Господни, восхвалишиися ныне нашими песнословиями.

О, преславнаго чудесе! Источник был еси изгания бесов из людей одержимых, Христа подражатель теплый, отче Петре, и ныне помогаеши всем с верою к твоим мощем притекающим, славословящих ныне память твою.

О, преславное чудес море от многоцелебных мощей отца нашего Петра истекает и море чад к ним с верою и молитвою притекает; никого в бедах и напастех на земли не оставил еси, ныне на Небесех моли у Господа исцеления, почитающих всечестную память твою.

О, преславнаго чудесе! В нашем храме возсияло солнце праведнаго Петра. Все стекошася прославляют его, яко добраго пастыря и наставника в добродетелях. Великаго за нас молитвенника и пред Богом ходатая, и безмезднаго целителя.

#### Слава, глас 4:

Многим постом и молением неусыпным очистив свой ум от всякия страсти, и сласти душевныя чистоты вкусив, всех нас, чад своих, отче Петре, зовещи к чистоте, глаголя нам: отложим чада дела темныя, яко во дни благообразно в храм ходим, не объядением и пьянством, не рвением и завистию, но облецитесь Господем нашим Иисусом Христом и плоти угодия не творите в похоти.

### И ныне, глас тойже:

Буди ми Руководительнице, Богоневестная Дево, руководящи нас на спасительной стезе, кую указал еси духовному нашему руководителю отцу Петру преподобный Серафим, и защити от восстающих на ны.

Великое славословие. Тропарь святому Петру.  
Слава и ныне: Богородичен по гласу тропаря.

### На литургии

Блаженны от канона песни 3-я и 6-я.

Прокимен, глас 7: Возвеселится праведник о Господе и уповает на Него.

Стих: Услыши Боже глас мой, внегда молитимися к Тебе.

Апостол ко Евреем, зачало 335.

Евангелие от Луки, зачало 24.

Причастен: В память вечную будет праведник, от слуха зла не убоится.

